

УИХ-ЫН СУДАЛГАА, ШИНЖИЛГЭЭНИЙ НЭГЖИЙН ТҮҮХЧИЛСЭН ТАНИЛЦУУЛГА

Ц. Норовдондог (Ph.D), О. Нарантуяа

1990 - 1994 он. Төр, нийгэм судлалын академи

1990 оны 6 дугаар сард явагдсан бүх ард түмний анхны чөлөөт ардчилсан сонгуулийн үр дүнд байгуулагдсан Бүгд Найрамдах Монгол Ард Улсын Бага Хурлын 1991 оны 6 дугаар сарын 15-ны өдрийн 44 дүгээр тогтоолоор жанжин Д.Сүхбаатарын нэрэмжит Улс төрийн дээд сургуулийг татан буулгаж, нийгэм-улс төрийн шинэ нөхцөл байдал үүссэнтэй уялдуулан Улсын Бага Хурлын дэргэд Төр, нийгэм судлалын академи байгуулсан.

Энэхүү Төр, нийгэм судлалын академийн гүйцэтгэх чиг үүрэг нь Төрийн байгуулалт, эрх зүй, улс төр судлал, социологи, төрийн эдийн засаг, нийгмийн бодлогын асуудлаар судалгаа явуулах, батлагдсан хуулийг таниулах, дэлхийн улс орнуудын парламентат ёсыг судалж, эрдэм шинжилгээний байгууллага, эрдэмтэдтэй хамтын ажиллагаа явуулах, Ардын Их Хурал, Улсын Бага Хурал, Улсын Ерөнхийлөгч болон өөрийн үйл ажиллагаанд шаардагдах мэдээллийн сан бий болгож, өөрийн номын сан байгуулах...зэрэг тодорхой чиг үүргийг гүйцэтгэж байжээ.

1994 - 1996 он. УИХ-ын дэргэдэх Судалгааны төв

1994 оны 01 дүгээр сарын 14-ний өдрийн УИХ-ын 15 тоот тогтоолоор Төрийн бодлого, нийгмийн асуудал судлах академийг УИХ-ын харъяанд шилжүүлэн ажиллуулах болсон байна. Төр, нийгмийн судлалын академийг БНМАУ-ын Бага Хурлын 1991 оны 6 дугаар сарын 15-ны өдрийн 44 дүгээр тогтоолоор тус улсын улс төрийн тогтолцоо, зах зээлийн харилцааны шинэ нөхцөлд төрт ёсны монгол уламжлалыг судлан эзэмших, төрийн бодлого, үйл ажиллагааны шинжлэх ухааны үндэслэл, үр өгөөжийг нэмэгдүүлэх шаардлагад нийцүүлэх ... зорилго бүхий эрдэм шинжилгээ, сургалтын байгууллага байв.

Судалгааны төв нь захирал, эрдэмтэн нарийн бичгийн дарга, секторын эрхлэгч 2, эрдэм шинжилгээний тэргүүлэх ажилтан 2, ахлах ажилтан 2, ажилтан 3, туслах ажилтан 2, нягтлан бодогч нийт 16 орон тоотой үйл ажиллагаа явуулж байсан. 1996 оны УИХ-ын хоёрдахь удаагийн сонгуулийн дүнд байгуулагдсан УИХ-ын 1996.08.30-ны өдрийн 37 дугаар тогтоолоор татан буулгасан бөгөөд чиг үүргийг нь хэрэгжүүлэх нэгжийг УИХ-ын Тамгын Газрын бүтцэд ажиллуулахаар шийдвэрлэжээ.

1996 - 2000 он. УИХ-ын Тамгын газрын нэгдүгээр нарийн бичгийн дарга болон Хуулийн хэлтсийн даргын харьяанд Судалгаа, мэдээлэл, лавламжийн алба

УИХ -ын Тамгын Газрын Ерөнхий нарийн бичгийн дарга 1996 оны 9 дүгээр сарын 13-ны өдрийн 175 дугаар захирамжаараа Тамгын Газрын бүтэц, орон тоог өөрчлөхдөө УИХ-ын Тамгын Газрын Ерөнхий нарийн бичгийн даргын нэгдүгээр орлогч бөгөөд Хуулийн хэлтсийн даргын эрхлэх асуудлын хүрээнд Судалгаа, мэдээлэл, лавламжийн алба байгуулсан. Тус алба шинжилгээ, судалгааны хэсэг, номын сан, архив, сүлжээ, программын хэсэгтэй нэлээд том нэгж байжээ.

2000 - 2003 он. УИХ-ын Тамгын Газрын Захиргаа, олон нийттэй харилцах хэлтсийн харьяа лавлагаа, мэдээллийн алба

Харин УИХ-ын Тамгын Газрын Ерөнхий нарийн бичгийн даргын 2001 оны 6 дугаар сарын 20-ны өдрийн 198 дугаар захирамжаар Тамгын Газрын зохион байгуулалтын бүтцийг шинэчлэн дээрх албыг Мэдээлэл, судалгааны хэлтэс болгосон байна. Ингэхдээ архив, сүлжээ, программын хэсгийг хасч, хэлтсийн дарга 1, судлаач 5, ахлах ном зүйч 1, ном

зүйч 1, номын санч 2, нийт 10 орон тоотойгоор ажиллуулсан боловч мөн оны 10 дугаар сарын 25-ны өдрийн 355 дугаар захирамжаараа тус хэлтсийг татан буулгаж, номын сангийн хэсгийг Тамгын газрын Захиргаа, олон нийттэй харилцах хэлтэст харъяалуулсан байна. УИХ-ын Байнгын хороодоос ирүүлсэн саналаар 2002-2005 онд нийт 7 судалгааны ажлыг БСШУЯ-ны Шинжлэх ухаан, технологийн сангийн санхүүжүүлэн ШУА-ын харъяа эрдэм шинжилгээний хүрээлэнгүүдээр хийлгүүлсэн байх бөгөөд тэдгээрийг 2-3 жилийн хугацаанд гүйцэтгэн, ихэнх судалгааны тайланг холбогдох Байнгын хороонд хүлээлгэн өгчээ.

2003 - 2008 он. УИХ-ын дэргэдэх Бодлогын шинжилгээний төв

УИХ-ын 2003 оны 6 дугаар сарын 20-ны өдрийн 37 дугаар тогтоолоор Монгол Улсын Их Хурлын дэргэдэх Бодлогын шинжилгээний төв байгуулсан. Төрийн бодлого боловсруулах, хэрэгжүүлэх, сурталчилах үйл ажиллагаанд шинжлэх ухааны мэдээллээр үйлчлэх чиг үүрэг бүхий уг төв захирал, эрдэмтэн нарийн бичгийн дарга, судлаач гэх мэт 17 хүний орон тоотой ажиллаж, 2004-2008 онд нийт 16 судалгааны ажил Байнгын хорооны болон бусад байгууллагын захиалгаар гүйцэтгэсэн ба дунджаар нэг судалгааны ажлыг 6-12 сар, бүр 4 жилийн хугацаанд ч хийдэг байжээ.

УИХ -ЫН ТАМГЫН ГАЗРЫН СУДАЛГАА ШИНЖИЛГЭЭ, ОЛОН НИЙТТЭЙ ХАРИЛЦАХ ТӨВ

УИХ-ын Тамгын газрын бүтцэд СШОНХТ-ийг байгуулсан эрх зүйн үндэслэл

- “Улсын Их Хурал өөрийн гишүүд, байнгын болон бусад хорооны үйл ажиллагаанд мэргэжил, арга зүй, техник, зохион байгуулалтын туслалцаа үзүүлэх болон ажиллах нөхцөлөөр хангах үүрэг бүхий Тамгын газартай байна. (Монгол Улсын Их Хурлын тухай хуулийн 31-р зүйлийн 31.4/
- Тамгын Газар нь УИХ-ын хууль тогтоох, хянан шалгах, төлөөлөх чиг үүргийг хэрэгжүүлэхэд мэргэшлийн зөвлөгөө өгөх, үйлчилгээ, бүх талын дэмжлэг үзүүлэх үндсэн чиг үүрэг бүхий мэргэшсэн алба байна. (Монгол Улсын Их Хурлын тухай хуулийн 32-р зүйл)
- “Парламентын ажлын мэргэшсэн алба болох УИХ-ын Тамгын Газрын үйл ажиллагааны зохион байгуулалт, үйчилгээний арга хэлбэрийг сайжруулах, ардчилсан засаглалтай орнуудын парламентын ажлын албаны түвшинд хүргэх (УИХ-ын 22-р тогтоол, “ Монгол Улсын Их Хурлын стратеги төлөвлөгөө”)
- Хууль тогтоох ажиллагааны нэг дутагдал бол шинээр гарах хуулийн төсөлд холбогдох судалгаа, дүн шинжилгээ хийх чадавхи сул, ялангуяа тухайн хуулиас үүдэн гарах эдийн засаг, нийгмийн үр дагаварыг судланшинжлэх явдал муу байна. Иймд Монголын Парламентаас хууль тогтоох буюу бодлого тодорхойлох чиг үүргээ хэрэгжүүлэх үйл ажиллагаандаа бодлогын шинжилгээ, эрсдэлийн менежментийг өргөн ашиглаж, гаргах гэж буй хууль, тухайн хуульд оруулах гэж буй нэмэлт өөрчлөлтийн эерэг, сөрөг тал, гарч болох эрсдэл, түүнийг даван туулах арга замыг тодорхойлж, чухамхүү “Долоо хэмжиж нэг огтол” гэсэн зарчмыг барьж ажиллах шаардлагатай.
- (НҮБХХ-ийн шугамаар “ Ардчилсан засаглалын парламентыг бэхжүүлэх” төслийн хүрээнд УИХ-ын Тамгын газрын чадавхийг бэхжүүлэх талаар хийсэн судалгааны дүгнэлт, зөвлөмж)
- Судалгаа хийх, санал дүгнэлт боловсруулахтай холбогдсон нийтлэг эрх, үүрэг:
- УИХ, Байнгын болон бусад хорооноос өгсөн үүрэг, ажлын хэсэг, УИХ-ын гишүүдээс тавьсан саналын дагуу тодорхой асуудлаар судалгаа хийх, санал дүгнэлт боловсруулах
- УИХ-ын үйл ажиллагаанд шаардагдах мэдээ, материал, улс орны нийгэм, эдийн засаг, хөгжлийн хөтөлбөрт холбогдох танилцуулга, судалгаа тооцоо, мэргэжлийн

албаны дүгнэлтийг бусад байгууллага, албан тушаалтанаас гаргуулан авах /УИХ-ын 2002 оны 5-р тогтоол, “Монгол Улсын Их Хурлын Тамгын газрын дүрэм, Нийтлэг чиг үүргийн матрицийн “Б”-д заасан эрх, үүрэг/

- Судалгаа шинжилгээ, олон нийттэй харилцах төв нь Улсын Их Хурлын ээлжит чуулганаар хэлэлцэх асуудлын хүрээнд ирүүлсэн захиалга, чиглэлийн дагуу болон Төвийн санаачлагаар цаг үеийн тулгамдсан асуудлууд, бодлогын чанартай асуудлуудаар судалгаа хийх, бодлогын шинжилгээний дүгнэлт, зөвлөмж гаргах, цаг үеийн шуурхай мэдээлэл, судалгааны мэдээллээр хангах, судалгааны мэдээллийн бааз бүрдүүлэх, хууль, тогтоолын төсөл болон бодлого боловсруулах шатанд иргэд, иргэний нийгмийн байгууллагууд, салбарын мэргэжилтнүүд, эрдэмтэн судлаачид, экспертүүдийн саналыг авах, хэлэлцүүлэг хийхтэй холбоотой үндсэн чиг үүргийг хэрэгжүүлнэ. (Монгол Улсын Их Хурлын Тамгын Газрын Ерөнхий нарийн бичгийн даргын “Тамгын газрын алба, хэлтсүүдийн ажлын чиг үүрэг шинэчлэн батлах тухай” захирамж, 2009.02.05, №73)

УИХ-ын даргын 2008 оны 11 дүгээр сарын 27-ны өдрийн 147 дугаар захирамж, УИХ-ын 2009 оны 1 дүгээр сарын 8-ны өдрийн 3 дугаар тогтоолоор дээрх төвийг Тамгын газрын зохион байгуулалтын бүтцэд шилжүүлэн Ерөнхий нарийн бичгийн даргын эрхлэх асуудлын хүрээнд Судалгаа, шинжилгээ, олон нийттэй харилцах төв болгон нийт 47 ажилтантай байгуулсан. Гэвч эдийн засаг, санхүүгийн хямралтай холбоотойгоор зарим орон тоог цомхтгосон шийдвэр гарч одоогоор нийт 33 ажилтантай ажиллаж байна / Судалгаа, шинжилгээ, олон нийттэй харилцах төвийн хамт олон/ 2009.03.07

Ажлын зохион байгуулалт, чиг үүрэг

Судалгааны төвд одоогоор төвийн дарга-1, ахлах референт-5, референт шинжээч-4, Референт судлаач-19, бүгд 29 хүн ажиллаж байна. СШОНХТ-ийн харьяанд УИХ-ын номын сан-3 хүнтэй ажиллаж байна. Бүтэц зохион байгуулалтын хувьд судалгааны 6 хэсэг, УИХ-ын номын сантай. Макро эдийн засаг, Эдийн засгийн бодит салбар, Нийгмийн бодлогын салбар, Дэд бүтцийн салбар, Бүс нутаг хөдөөгийн хөгжлийн салбар, Эрх зүй, төрийн байгуулалт, гадаад бодлогын судалгааны салбар гэсэн судалгааны 6 чиглэлд холбогдох асуудлуудаар судалгаа хийж байна.

Судалгаа, шинжилгээ, олон нийттэй харилцах төв УИХ-ын ээлжит чуулганаар хэлэлцэх асуудлуудын хүрээнд УИХ-ын гишүүд болон Байнгын хороодоос ирүүлсэн захиалга, чиглэлийн дагуу, мөн төвийн санаачлагаар цаг үеийн тулгамдсан асуудлуудаар бодлогын судалгаа, харьцуулсан судалгаа, тойм судалгаа, мэдээлэл судалгаа, лавлагаануудыг бэлтгэн гаргаж байна.

Судалгааны чиглэлүүд

1. Нийгмийн бодлогын судалгааны баг

- 1.1 Нийгмийн хамгаалал, хөдөлмөр эрхлэлтийн бодлого
- 1.2 Ядуурал, ажилгүйдлийг бууруулах бодлого
- 1.3 Гэр бүлийн хөгжил, хүн ам зүйн бодлого
- 1.4 Жендерийн тэгш байдлыг хангах бодлого
- 1.5 Боловсрол, соёл, шинжлэх ухаан, технологийн хөгжлийн бодлого

2. Макро эдийн засгийн бодлогын судалгааны салбар

- 2.1 Төсвийн бодлого
- 2.2 Татварын бодлого
- 2.3 Мөнгөний бодлого

- 2.4 Санхүүгийн зах зээлийн хөгжлийн бодлого
- 2.5 Засгийн газрын өрийн бодлого
- 2.6 Гадаад худалдааны салбарын бодлого
- 2.7 Өрсөлдөх чадварыг сайжруулах бодлого
- 2.8 Хувийн хэвшлийн салбарыг хөгжүүлэх бодлого

3. Эдийн засгийн бодит салбарын хөгжлийн бодлогын судалгааны хэсэг

- 3.1 Геологи, уул уурхай, эрдэс баялаг, хүнд үйлдвэрийн хөгжлийн бодлого
- 3.2 Аж үйлдвэрийн салбарын хөгжлийн бодлого
- 3.3 Боловсруулах аж үйлдвэрийн салбарын хөгжлийн бодлого
- 3.4 Байгаль орчин, экологийн бодлого
- 3.5 Аялал жуулчлалын салбарын бодлого
- 3.6 Жижиг, дунд үйлдвэрлэл, үйлчилгээний салбарын бодлого
- 3.7 Хүнс, хөдөө аж ахуйн салбарын бодлого

4. Дэд бүтцийн хөгжлийн бодлогын судалгааны салбар

- 4.1 Зам, тээврийн салбарын хөгжлийн бодлого
- 4.2 Хот байгуулалт, барилгын салбарын хөгжлийн бодлого
- 4.3 Эрчим хүчний салбарын хөгжлийн бодлого
- 4.4 Түлшний салбарын хөгжлийн бодлого
- 4.5 Мэдээлэл, холбооны технологийн салбарын хөгжлийн бодлого

5. Бүс нутаг, хөдөөгийн хөгжлийн бодлогын судалгааны салбар

- 5.1 Бүсчилсэн хөгжлийн бодлого
- 5.2 Эдийн засгийн чөлөөт бүсийн хөгжлийн бодлого
- 5.3 Хөдөөгийн хөгжлийн бодлого

6. Төрийн байгуулалт, эрх зүйн шинэтгэл, гадаад бодлогын судалгааны хэсэг

- 6.1 Эрх зүйн шинэтгэлийн бодлого
- 6.2 МУ-ын төрийн байгуулалт, төрийн удирдлагын бодлого
- 6.3 МУ-ын төрийн захиргаа, төрийн албаны шинэтгэлийн бодлого
- 6.4 Үндэсний аюулгүй байдлын бодлого
- 6.5 Гадаад харилцааны бодлого
- 6.6 Батлан хамгаалах салбарын бодлого
- 6.7 Парламент судлал

Судалгааны дүгнэлт, санал зөвлөмж болон тухайн асуудлыг шийдвэрлэх бодлогын хувилбаруудыг онол, практик, бусад орнуудын туршлагатай харьцуулан бодлогын судалгааны онол арга зүй, өргөн хүрээтэй мэдээллийн бааз дээр тулгуурлан боловсруулж мэдээлэл, судалгаагаар УИХ-ын гишүүдийг жигд хангах асуудалд Тамгын газар болон Судалгааны төв анхаарч байна. Мөн Дэлхийн эдийн засгийн болон Монгол улсын эдийн засаг, нийгмийн байдалын талаархи статистик мэдээллүүдийг сар, улирлаар тоймлон бэлтгэж дотоод сүлжээнд байрлуулахын зэрэгцээ УИХ-ын гишүүд, Тамгын газрын алба хэлтсүүдийг тойм мэдээллээр хангаж байна.

Судалгааны төв хууль, тогтоолын төсөл, бодлогын баримт бичиг боловсруулах шатанд



иргэд, иргэний нийгмийн байгууллагууд, салбарын мэргэжилтнүүд, эрдэмтэн судлаачид, судалгааны байгууллагууд, экспертүүдийн саналыг авч судалгааны түвшинд нэгтгэн боловсруулалт хийж байна. Энэ чиглэлээр бусад судалгааны байгууллагууд, төрийн болон төрийн бус байгууллагуудтай харилцаа холбоо тогтоож, УИХ-ын номын санг түшиглэн хэвлэл мэдээллийн эх сурвалжуудад анализ хийх, холбогдох байгууллага, мэргэжилтнүүдийн саналыг авах, интернетийн эх сурвалжуудыг ашиглах замаар томоохон хэмжээний судалгааны мэдээллийн баазыг бүрдүүлж байна.

Судалгааны ажлын зохион байгуулалтыг байгаа хүн хүч, нөөц боломжиндоо тулгуурлан оновчтой зохион байгуулж судлаачдыг мэргэшүүлэх, хурдан хугацаанд чадваржуулах, судалгааны төвийн үйл ажиллагааг жигдрүүлэх, төлөвшүүлэх тал дээр анхааран ажиллаж байна.



УИХ -ын Тамгын газрын Судалгаа шинжилгээ, олон нийттэй харилцах төвийн хамт олон, 2009. 3. 07

Судлаачдаас Доктор Ph.D - 4, магистр - 16, эдийн засагч - 5, хууль эрх зүйч - 11, Улстөр судлаач -1, багш - 2, маркетингийн менежер - 2, инженер - 4, сэтгүүлч - 2, химич - 1, УИХ-ын гишүүн асан 2 хүн байна. УИХ-ын Судалгааны төв нь цаг үеийн тулгамдсан асуудлуудыг шийдвэрлэх бодлогын хувилбаруудыг боловсруулахад үндсэн үйл ажиллагаагаа чиглүүлж байна. Ийм учраас дагуу хууль тогтоомжийн хэрэгжилтийн явцад олон нийт, төрийн болон төрийн бус байгууллагуудаас гарч байгаа саналуудыг тэнцвэртэйгээр авч судлах, нөхцөл байдлын үнэлгээ хийх, хууль тогтоомж, бодлого шийдвэрийн онолын үндэслэлийг боловсруулах, эрх зүйн зохицуулалтын олон улсын стандарт болон бусад орнуудын туршлагыг судлах, тухайн асуудлыг шийдвэрлэх бодлогын гарц буюу хувилбар, санал зөвлөмж боловсруулах тал дээр чармайлт гарган ажиллаж байгаа юм. Ялангуяа хууль тогтоомж, бодлого боловсруулах шатанд Ажлын хэсгийн хэрэгцээнд, мөн УИХ-аар тухайн асуудлыг хэлэлцэн батлах үед УИХ-ын гишүүдэд дээрхи судалгаа, мэдээллүүд ихээхэн ач холбогдолтой байдаг.

Улсын Их Хурлын 2009 оны хаврын ээлжит чуулганы хугацаанд гүйцэтгэсэн судалгааны ажлын мэдээлэл

Судалгааны төвөөс өнгөрсөн хугацаанд нийт 41 судалгааны ажлыг гүйцэтгэжээ. Үүнээс: Бодлогын судалгаа-8, Харьцуулсан судалгаа- 11, Тойм судалгаа-9, Мэдээлэл судалгаа-11, Контент анализ-1, илтгэл-1-ийг тус тус бэлтгэн гаргасан. Үүнээс: Байнгын хороодын захиалгаар-7, УИХ-ын гишүүдийн захиалгаар-20, Судалгааны төвийн санаачлагаар- 14 судалгааны ажлыг гүйцэтгэв.

Судалгааны төвд хийгдсэн судалгаанаас УИХ-ын бүх гишүүдэд 18 судалгаа, захиалагчид -23 судалгааг тус тус хүргүүлж, дотоод сүлжээнд судалгааны ажлын талаархи мэдээллийг байршуулж байна. Гүйцэтгэсэн судалгааны ажлуудыг төрөл тус бүрээр кодлон хэвлэмэл болон цахим байдлаар мэдээллийн бааз болгон хадгалж байна.

Өнгөрсөн чуулганы хугацаанд Эдийн засаг, санхүүгийн хямрал, Оюу толгой ордыг ашиглах хөрөнгө оруулалтын гэрээ, Бүс нутгийн хөгжлийн асуудлууд, Валютын зах зээлийн зохицуулалтын асуудлууд, Малчдын зээлийн асуудал, Нийгмийн даатгалын болон Эрүүл мэндийн даатгалын хуулиудын хэрэгжилт, Төрийн албан хаагчийн ёс зүйн асуудал, Уран олборлох, ашиглах асуудлууд, Өрсөлдөөний бодлого, Хөрөнгөөр баталгаажсан үнэт цаасны зах зээлийн асуудал зэрэг олон чухал асуудлуудаар судалгааны ажлыг гүйцэтгэлээ.

Хаврын чуулганаар ашигт малтмалын орд ашиглах гэрээ, ипотекийн үнэт цаасны зах зээл, хадгаламжийн даатгал, хот тосгоны эрх зүйн байдал, таваар түүхий эдийн биржийн асуудал, бичил уурхай, хийн хангамж зэрэг олон чухал асуудлуудыг хэлэлцсэн учраас судалгааны төв цаашид томоохон хэмжээний, чухал ач холбогдолтой бодлогын судалгаан дээр төвлөрч ажиллах болно.

Гадаад харилцаа

УИХ-ын Тамгын газрын ажилтнууд /СШОНХТ-ийн ажилтан Ю.Эрдэнэтуяа, Ц.Мягмарцэрэн, А.Пагма/ 2009 оны 3 дугаар сарын 22-29-ны өдрүүдэд Бүгд найрамдах Франц улсын Парламентын үйл ажиллагаатай танилцах айлчлал хийв. Айлчлалын хүрээнд Бүгд Найрамдах Франц улсын Эдийн засаг, үйлдвэр, хөдөлмөрийн яамны Уул уурхайн агентлаг, Парламентын номын сан, архивын үйл ажиллагааны зохион байгуулалт, хуулийн судалгааны алба, Парламентын дээд танхим болон Сенатын үйл ажиллагааны талаар туршлага судлав.

СШОНХТ-ийн дарга Ц.Норовдондог, референт-судлаач Ц.Болормаа болон УИХТГ-ын ажилтан н.Батмөнх нар 2009 оны 6 дугаар сарын 16-19-нд Австрали Улсын Парламент болон Парламентын Тамгын газрын үйл ажиллагаатай танилцан туршлага судлах айлчлал хийлээ.

Энэхүү туршлага солилцох айлчлалын хүрээнд Австралийн парламентын дээд болон Төлөөлөгчдийн танхимын Тамгын газрын үйл ажиллагаа түүнчлэн парламентад мэдээлэл, судалгааны үйлчилгээ үзүүлдэг номын сангын үйл ажиллагаатай нарийвчлан танилцсан юм.

СШОНХТ-ийн ажилтануудад Бүгд Найрамдахчуудын Олон Улсын хүрээлэнгээс 2009 оны 2 дугаар сарын 10-11-ны хооронд “УИХ-ын Тамгын газрын судалгаа шинжилгээний чадавхийг бэхжүүлэх нь” сэдэвт сургалтын зохион байгуулав. Сургалтанд АНУ-ын Конгрессийн судалгааны албаны Мэдээлэл, судалгааны мэргэжилтэн Шэрри Шапиро хүрэлцэн ирж зөвлөгөө өгөв. Мөн 2009 оны 6 дугаар сарын 29-30-ны өдрүүдэд Конгрессын гишүүдийг дагалдан яваа ажлын хэсэг УИХ-ын Тамгын газрын Судалгаа шинжилгээ, олон нийттэй харилцах төвийн ажилтнуудтай уулзалт хийв. Төлөөлөгчдийн бүрэлдэхүүнд Конгрессын

Судалгааны албаны хэлтсийн орлогч дарга Клей Вэллборн, Конгрессын Судалгааны албаны Азийн асуудал хариуцсан мэргэжилтэн Брюс Боон, Конгрессын Судалгааны албаны Мэдээлэл судалгааны мэргэжилтэн Шерри Шапиро, Төлөөлөгчдийн танхимын Ардчилалыг Дэмжих Комиссын мэргэжилтэн Маргарита Семинарио нар оролцов.

Ажлын хэсгийн бүрэлдэхүүн УИХ-ын Судалгааны төвийн судалгаа, шинжилгээний ажил гүйцэтгэх процесстой нарийвчлан танилцаж туршлага солилцов. Төлөөлөгчид болон судалгааны төвийн ажилтнууд асуулт, хариултын журмаар харилцан ярилцаж, бие биенийхээ сонирхсон асуултанд хариулт өгөв. Дэлхийн банк, ННФ, БНОУХ, Азийн сан, АНУ-ын Конгрессийн Ардчилалыг дэмжих комисс зэрэг олон улсын байгууллагууд, эрдэм шинжилгээ, сургалт, судалгааны олон байгууллагууд, эрдэмтэн судлаачид, төрийн болон төрийн бус байгууллагууд тус төвөөр дамжуулан судалгааны үр дүн, санал зөвлөмжөө УИХ-д хүргэх сонирхол, хамтран ажиллах санал, хүсэлтээ илэрхийлж байгааг бид нааштайгаар хүлээн авч, тууштай хамтран ажиллахыг эрмэлзэж байна.



UIH.MN
СУДАЛГААНЫ САН